

詞林典故

卷二

官制

附詹事府

翰林之名。見於漢時。未以署官。特作賦者。假喻於文辭云爾。唐翰林院。初本儒臣文學供奉待詔之所。至開元中始設學士。亦無定員。皆以他官選充。宋元及明相沿代。

置品秩名數亦隨時不同。唐翰林學士外。先有弘文。集賢。學士。大學士。宋資政。觀文。天章。龍圖之設。則視乎唐。明華蓋。謹身。文淵。東閣之稱。又視乎宋。而明初左右春坊。亦置大學士。自成祖以翰林官直文淵閣。故翰林以閣中爲內署。又與詹事互兼職業。是以三署相通。若夫唐之翰林學士或

知制誥。或不知制誥。宋學士知制誥。與中書舍人分爲兩制者。則自後晉始。唐之講讀學士。皆不繫翰林。其繫以翰林者。則自宋始。宋之檢討編修。史院及他司皆有之。而翰林則無。後獨歸於翰林者。則自明始。至如唐宋宮僚。輕於翰林。明則庶子中贊。爲修撰編檢之遷階。謂之開坊。以詹事爲

學士之晉秩。謂之出院。唐宋翰林乞郡出外。得以原官結銜。明則改官不得帶帖。唐宋校理館職。雖進士上第。未卽銓除。必由記室幕僚仕於州縣者。召試而得。明則鼎甲三人。卽授修撰編修。而庶吉士留院者。便已授職。唐宋應奉直院。權直之號。至明盡除。而有五經博士。侍書之目。與庶吉士

之選。此其沿革之大凡。古今之殊致矣。魏晉以來。置秘書中書著作。江左唐宋具有其官。唐設起居郎舍人史館領在門下。宋則國史有院。著作有局。皆通於秘書省。雖官異翰林。而事實相近。至明代官從併省。統歸翰林。講讀以上。則同古之兩制侍從。修撰而下。則同古之秘書著作。而史職繫

焉。自是翰林員品有定。

皇朝敘官。初以內閣翰林之職。統於內三院。歷

經

聖神裁定。內設殿閣大學士。外設翰林院。官制大
備。至詹事春坊。始亦議裁。尋並復焉。其與
翰林院相通互兼。具垂令典。因附著於篇。

漢

漢武帝初徵賢良文學待詔金馬門。漢書

漢武帝建藏書之策置寫書之官。同上

漢置五經博士。同上

後漢

後漢東觀有校書之職選他官典校秘書撰

述傳記。通典

後漢著作皆以他官領。同上

後漢光和元年。置鴻都門學士。後漢書

後漢延熹二年。始置秘書監一人。通志

按漢時翰林。未有定職。然後世翰林待詔。博士。學士之名。已始於此。翰林志云。武帝時。東馬嚴枚。皆在左右。亦其事也。

魏

魏武帝置秘書令。丞。秘書郎。通典

魏文帝置中書令。改秘書令爲監。通志

按後世以入翰林爲讀中秘書。考漢藏書之所。石渠。石室。延閣。廣內。則在外府。蘭臺。秘書。及麒麟。天祿。則在內禁。爲御史中丞所掌。劉向又言外有太常博士之藏。而後漢圖書則在東觀。魏改漢蘭臺令曰秘書。又改中書。至晉以中書統秘書。武帝以秘

書借張華讀之。所云讀中秘書者。蓋引此
爲故實也。

魏明帝青龍四年四月。置崇文觀。徵善屬文
者以充之。三國志

晉

晉武帝以秘書并中書省。晉書

晉永平中。復置秘書監。其屬有丞有郎。統著

作省。著作郎一人。又置著作佐郎八人。同上

東晉

東晉元帝建武元年十一月。置史官。同上

宋

宋置秘書著作。與晉同。通典

宋明帝泰始六年九月。立總明觀。徵學士以

充之。宋書

齊

齊置秘書監丞郎。著作佐郎。員額悉如宋。

齊書

梁

梁置中書省監令各一人。秘書省監丞各一

人。郎四人。文獻通考

按晉中書令管機務。蓋宰相之任。而秘書
著作統焉。六朝唐宋沿之不改。卽明大學

士統翰林院。而翰林所爲入閣辦事。亦仿於此。

陳

陳承梁仍各設侍從文章制命典籍之職。古

今圖書集成

按典籍名始此。

陳永定三年閏四月。置西省學士。陳書

北魏

北魏太和十五年。置左右史官。魏書

北魏置起居令史。文獻通考

按起居注始於漢時。宋林駟云。漢武有禁中起居注。東漢明德馬后。撰明帝起居注。本宮中女史之任。三國志注引漢獻帝起居注。則近侍爲之。通典云。魏晉起居注。著

5193
作郎掌之。隋初以吏部散官及校書正字
有著述才者領之。唐高祖初。溫大雅作勅
業起居注。於時亦未有專官。自貞觀顯德
間。設郎舍人。而起居注乃有定職。

又按起居注。或以爲本古左右史而設。然
考之於書。左史僅一見於楚之倚相。一見
於汲冢之戎夫。而右史無聞焉。蓋左右史

本非周官。卽詩傳言衛武公左右置監史以自警。特一時一人之事。後世傳之。遂有記言記動之說。而玉藻乃著其文。玉藻出漢儒。亦止述所傳聞之辭。未必古時專署其官。至五帝外紀。稱蒼頡沮誦爲左右史。疑於荒遠。惟唐藝文志。以穆天子傳爲起居注之始。體或然爾。

北齊

北齊有起居省。文獻通考

北齊秘書省。監丞各一人。郎中四人。校書郎

十二人。正字四人。又領著作省。郎二人。佐

郎八人。校書郎二人。隋書

北周

北周有麟趾殿學士。有外史。通典

詞林典故

卷二 官制

九

按後以殿名加學士。稱麟趾。其權輿也。

北周秘書監。領著作。校書郎。下士十二人。

著作。上士二人。中士四人。同上

按周蘇綽以周官行官制。故有外史。上中下士之目。

隋

隋承周。有麟趾殿學士。隋書

隋置秘書省監丞各一人郎四人校書郎十
二人正字四人錄事二人領著作太史二
曹著作曹郎二人佐郎八人校書郎正字
各二人太史曹令丞各二人。同上

按太史之名夏商時已有之。若夏太史終
古商太史高勢是也。至周官四史內史掌
八枋與公卿策命及四方之事書則似後

世尚書主章奏詔令之職。外史掌四方之志。三皇五帝之書。則似後世御史中丞掌殿中圖籍之職。小史掌邦國之志。詔王忌諱。則似後世管玉牒氏族世系名諱之職。而太史日官也。掌建邦之六典。與後司記載者。皆絕不同。若齊太史。晉太史。執簡而書。殆爲近似。然考左傳。國語。國策。世本等。

皆非當時史官所著。卽太史公亦自稱近
於卜祝之間。其所爲著書。亦祇自成紀撰。
非奉職爲之。馬端臨以周四史列於史官。
亦但沿習其名耳。自隋立太史局。唐宋以
來。居史職者。多稱太史。至明時。則凡翰林
修撰等。並稱太史焉。

隋開皇十四年。秘書省置主事令史。隋書

隋大業十一年。增秘書省官百二十員。以博

士補之。玉海

唐

唐置門下省起居郎二人。中書省起居舍人

二人。唐書

唐置門下省校書郎二人。中書省校書四人。

正字二人。同上

唐置史館於門下省。史館修撰四人。同上

百官志注。天寶後。他官兼史職者曰修撰。初入爲直館。元和六年。登朝官領史職者爲修撰。未登朝官皆爲直館。大中八年。汰直館二人。增修撰四人。按唐初令狐德棻請修近代之史。遂命修撰。修撰之名始此。唐秘書省置監一人。少監二人。丞一人。領著

作局。少監爲之貳。同上

百官志注。龍朔二年。改秘書省曰蘭臺。監

曰太史。少監曰侍郎。丞曰大夫。秘書郎曰

蘭臺郎。垂拱元年。又改曰麟臺。太極元年。

復稱秘書省。按唐秘書省隸中書。如晉制。

唐秘書省秘書郎三人。校書郎十人。正字九

人。同上

唐秘書省領著作局。郎二人。著作佐郎二人。

校書郎二人。正字二人。同上

百官志注。龍朔元年。改著作局曰司文局。

郎曰郎中。佐郎曰司文郎。

唐置弘文館學士。同上

百官志注。武德四年。置修文館於門下省。

九年。改弘文館。儀鳳中。置詳正學士五品。

以上曰學士。六品以下曰直學士。神龍元年。改昭文館。景龍二年。置大學士四人。學士八人。直學士十二人。開元七年。改曰弘文館。置校書郎校理等官。長慶三年。罷詳正學士。專以五品以上曰學士。六品以下曰直學士。未登朝爲直館。

唐置集賢院學士。同上

百官志注。開元五年。置乾元院使。有刊正
官四人。知書官八人。六年。更號麗正書院。
置詳檢官。改修書官爲麗正殿直學士。八
年。加文學直。又加修撰。校理。刊正。校勘官。
十三年。改麗正書院爲集賢書院。有學士
直學士。宰相一人爲學士。知院事。常侍一
人爲副知院事。又置院判。押院。中使各一

人。元宗嘗選耆儒日一人侍讀。至是置集
賢院侍講學士。侍讀直學士。增修撰。校理。
待制。留院。知檢討。與文學直之員。至德二
年。置大學士。貞元四年。罷大學士。八年。罷
校理。置校書四人。正字二人。元和二年。復
置集賢校理。罷校書正字。四年。集賢學士。
直學士。皆用五品。以學士一人。年高者判。

院事。按檢討之名始此。

唐元宗初設翰林院。召文學儒臣待詔院中。

翰林志

唐開元二十六年。於翰林院置學士。同上

按翰林志。太宗時召學士草詔。然猶未有名號。乾封已後。始號北門學士。元宗初置翰林待詔。選朝官入居。供奉別旨。開元二

十六年。始以翰林供奉改稱學士。其首爲之者。則張洎劉光謙也。元宗雖改供奉爲學士。別建學士院於翰林院之南。時猶未稱翰林學士。至德宗以後。翰林始兼學士之名。是元宗雖置學士。而翰林學士之定稱。則在永貞貞元時始矣。

又按唐翰林學士。本非專設。以他官兼充。

之。自中舍尚書郎拾遺補闕校書著作皆
選任。雖縣尉亦得召入供職。李商隱白居易
易碑以蓋屋尉召入是也。又弘文館隸門
下省。集賢院隸中書省。而翰林獨無所隸。
其後又置東翰林院於金鑾殿。故又有金
鑾殿學士。後人呼學士爲鑾坡。蓋以此。
又按自揚雄有翰林主人之稱。後世沿之。

晉李充論著翰林。梁鍾嶸詩評稱郭璞爲翰林詩首。唐李邕稱翰林六絕。蓋用以標文苑之目耳。唐取此名院。且以署官。開元而後。其職益重。至宋時遂目爲將相儲材之地云。

唐翰林學士承旨。

學士院記

按元稹記云。舊制學士無承旨名。憲宗始

命鄭絀爲承旨。翰林志云。元和已後。院長一人。或密受顧問。獨召對敕。居北壁之東閣。號爲承旨閣子。

五代

後梁開平三年。改思政殿爲金鑾殿。置大學士一員。文獻通考

後唐置翰林承旨一員。同上

後晉天福五年。廢翰林學士。尋復置。五代史

後晉開運元年。詔翰林學士與中書舍人分

爲兩制。各置五員。文獻通考

按宋兩制之目由此。五員。續翰林志作六員。蓋因宋制言之。似當以通考爲正。

宋

宋置起居郎舍人。如唐制。文獻通考

按宋起居郎隸門下省。起居舍人隸中書省。號小兩省官。林駟至論云。元豐官制行。分郎與舍人爲左右。時又稱左右史。

宋秘書省監少監丞各一人。其屬著作郎一人。著作佐郎二人。秘書郎二人。校書郎二人。正字二人。宋史

宋置直秘閣。文獻通考

按宋初以史館。昭文館。集賢院爲三館。皆寓崇文院中。端拱元年。詔就院之中堂建秘閣。置直秘閣。以直館直院爲之。謂之館職。以他官兼者。謂之貼職。

宋置國史院監修一人。以宰相爲之。修撰直館。檢討。無常員。同上

按宋天聖間。以宰相爲提舉。以三館秘閣

校理爲編修官。元祐間。復改隸門下省。紹聖間。歸秘書省。

又按宋之編修。不止史院。三司樞密院皆有編修官。編修之名始此。

宋承唐設翰林學士院。置翰林學士承旨。翰林學士。知制誥。直學士院。翰林權直。學士院權直。宋史

按宋史。承旨不常置。以學士久次者爲之。凡他官入院。未除學士。謂之直院。學士俱缺。他官暫行文書。謂之權直。

又按通考。唐之所謂翰林學士。只取六學之人。隨其官之崇卑。入院者皆爲學士。其尊貴親遇者。號稱內相。可以朝夕召對。參議政事。或一遷而爲宰相。而其孤遠新進。

者。或起自初階。或元無出身。至試令草麻
制。甚者或試以詩賦。如試進士之法。其人
皆呼學士。自唐至五代皆然。至宋則始定
制。資淺者爲直院。暫行者爲權直。於是真
爲翰林學士者。職始顯貴。可以比肩臺長。
舉武政路矣。

宋咸平二年。置翰林侍講學士。翰林侍讀學

士。同上

按宋經筵官。其秩尊者。爲講讀學士。品卑資淺。則爲說書。元豐官制行。罷翰林講讀學士。用侍從以上官兼充。

宋置樞密直學士。同上

按林駟至論云。宋承唐制。學士以六員爲額。其知制誥。卽治本院事。其別領省府職

任。卽不帶制誥。如知通進銀臺司兼門下事。則卽唐給事中比也。而隸直樞密院兼制誥。卽唐中書舍人之任也。

宋置資政殿大學士。同上

宋置觀文殿大學士。同上

按宋資政觀文二大學士。蓋特設以加寵宰相舊臣。不爲常置。大抵如漢特進光祿

大夫。晉宋冗從僕射奉朝請之比。與明時典機務者不同。而名差近焉。

宋置殿閣學士。殿曰資政。端明等。閣曰天章。龍圖。寶文。顯謨。徽猷等。皆設學士。直學士。待制。同上

按宋殿閣學士。多爲從官及外除者兼銜。待制如唐待詔。而官稍貴。宋仁宗特開天

章閣以待范仲淹。諮訪政事。待制之設始此。而龍圖學士尤多有名。若包拯。龐籍。孫覺。祖無擇等。皆嘗爲之。宋時稱其官。相謂爲龍學云。南渡後。敷文。煥章。華文。寶謨等閣。設學士。直學士。待制。一倣汴京舊制。

遼

遼置門下省起居郎。起居舍人。知起居注。遼

史

遼置國史院史館學士。同上

遼置翰林院翰林學士承旨翰林學士翰林

祭酒。同上

按遼國語以文翰爲林牙。故翰林設都林牙。又有北面林牙。則掌契丹文字行於國中者。南面林牙。則兼掌中國文字。

遼置崇文館大學士。宣政殿學士。觀書殿學

士。乾文閣學士。昭文館直學士。同上

金

金置秘書省監。少監。丞。秘書郎。金史

金置弘文院知院。同知弘文院官。同上

金置國史院監修國史官。編修檢閱官。古今

圖書集成

按遼金官制。國史院皆有監修國史官。蓋用唐故事。以宰相兼領。實非史院正官也。

金置翰林學士院。翰林學士承旨。直學士。翰林侍講學士。侍讀學士。翰林待制。翰林修撰。翰林應奉文字。金史

按翰林修撰之名自金始。

元

元置集賢院。秘書監。藝文監。監書博士。元史

元設翰林兼國史院。置學士承旨。翰林學士。

侍講。侍讀學士。直學士。待制。應奉翰林文

字。修撰。編修。檢討。典籍。經歷。都事。又設蒙

古翰林院。同上

按元史百官志。列朝官制。置罷不一。先後
員額。增減不定。其集賢院。初併入翰林。後

則分設。

明

明初置翰林院。爲正三品衙門。設學士承旨。

學士。侍講學士。侍讀學士。直學士。典簿。待

制。修撰。應奉。編修。典籍。檢閱等官。明會典

按明會典。又有秘書監。弘文館。及起居注等官。後皆不設。黃佐翰林記。洪武三年。置

校書郎等官。九年罷之。又云國初翰林有國史院。院有編脩官。後不復設。而以脩撰編修檢討。專爲史官。隸翰林院。然史官皆預講讀。講讀官亦預史官。實不分職。

明洪武十四年五月。改翰林院爲正五品衙門。設學士一人。侍講學士二人。侍讀學士二人。孔目一人。屬官。侍講二人。侍讀二人。

五經博士五人。典籍二人。侍書二人。待詔
六人。史官。修撰三人。編修四人。檢討四人。
革承旨。直學士。待制。應奉。檢閱。典簿。翰林記

明洪武十八年三月。定翰林院正官。學士一
人。正五品。侍讀學士。侍講學士。各二人。從
五品。首領官。孔目一人。未入流。屬官。侍讀
侍講各二人。正六品。五經博士五人。正八

品。典籍二人。從八品。侍書二人。正九品。待
詔六人。從九品。史官。修撰三人。從六品。編
修四人。正七品。檢討四人。從七品。同上
按明永樂十九年。南京翰林院。惟設掌院
學士一員。孔目一員。

又按明初置五經博士。人司一經。永樂以
後。以孔。顏。孟。氏。周。程。朱。子。之裔。皆世襲五

經博士。而洪武中所置之五經博士。漸廢不復設矣。又翰林記云。侍讀先侍講始於此。蓋唐宋時。侍講皆在侍讀之上也。

明洪武十八年三月。又定華蓋殿。武英殿。文華殿。文淵閣。東閣。設大學士各一人。同上

明洪熙中。添設謹身殿大學士。明會典

按永樂初。命編修等官。於文淵閣參預機

務。謂之內閣。漸陞至學士諸職。洪熙元年。或加師保。及尚書侍郎卿。仍兼學士大學士銜。自後因之。稱內閣大學士。凡大學士加三師則爲一品。加尚書二品。侍郎三品。若未加陞而止。係大學士者。則仍正五品。明經筵官。有知經筵事。同知經筵事。講官推舉。皆出內閣。又令本院及坊局官侍班。久

之選爲展書官。又自展書充月講官。年深秩尊者充日講。翰林記

按明史。故事率以翰林大僚直日講。鮮及史官者。至于慎行。張位。王家屏。沈一貫。陳于陞。咸以史官得之。異數也。

明洪武中。定翰林院爲近侍清貴之職。凡遷轉皆出自上裁。不付銓衡。同上

按明制。翰林院遷官。始自詹事府左右春坊。司經局。循至學士。其轉則吏部尚書侍郎。以至內閣。不及他途。然非九年考滿。則纂修書籍。名雖親擢。寔循資格也。又翰林不由吏部選。自唐宋已然。

又按黃佐云。本院官外擢皆升高位。無有對品調者。若洪武時王禕出爲南康府同

知。賜金帶。出自親擢。事體不同。其降謫者。不在此格也。

明制。非進士起家。不得居翰林。天順實錄

按黃佐云。洪武初。本院官皆由薦舉進。四年。雖設進士科。未有入翰林者。今考進士入翰林。自洪武十八年始。至天順間。遂定斯制云。

明洪武十八年。選進士爲庶吉士。翰林記

按明旣設進士科。以諸進士未更事。俾觀政於諸司。其在本院承敕監等近侍衙門者。採書庶常吉士之義。名庶吉士。其在六部及諸司者。則仍稱進士。正統後始定庶吉士止入翰林。凡庶吉士入翰林者。選無定員。

明制進士第一甲三人稱及第。卽授職修撰。

編修。第二甲第一人。第三甲第一人。稱賜

進士出身。賜同進士出身。皆授編修。

國朝故事

按洪武十八年三月。旣殿試。以第一甲丁

顯等三人。並爲修撰。至二十一年策進士。

以第一甲第一人任亨泰爲修撰。第二人

唐震。第三人盧原質爲編修。自是遂爲定

式

又按永樂二年。定庶吉士散館授職。二甲除編修。三甲除檢討。

明英宗時。選奇童及善書者。充翰林院秀才。

翰林記

皇朝

國初設文館於

詞林典故

卷二 官制

三

盛京。

太宗天聰十年三月。改建內三院。曰內國史院。內秘書院。內弘文院。

世祖順治元年三月。增設三院學士各一員。十一月。定翰林院爲正三品衙門。晉學士秩正三品。侍讀侍講學士正四品。侍讀侍講正五品。修撰從六品。編修正七品。檢討從七

品。裁博士侍書待詔。二年三月。定內三院
爲二品衙門。四月。令翰林官由內院補授。
閏六月。裁翰林院以歸內三院。定內三院
大學士二員。爲二品。學士四員。爲三品。侍
讀六員。爲四品。筆帖式三員。爲七品。六年
正月。更定內院官制。三院各設學士一員。
侍讀侍講學士各一員。侍讀侍講各一員。

八年四月。增設三院侍讀學士各三員。裁

侍讀各二員。十年六月。增設三院漢大學

士各二員。十五年七月。裁內三院。改三院

大學士。爲殿閣大學士。秩仍正五品。置翰

林院。定掌院學士。學士秩仍五品。十六年

五月。設翰林院侍讀侍講學士。及侍讀侍

講各三員。十八年六月。裁內閣翰林院。復

設內三院。七月。設內三院滿漢大學士各一員。滿學士各二員。漢軍漢學士各一員。聖祖康熙元年二月。增設內三院侍讀學士各二員。正四品。侍讀各二員。正五品。八年七月。裁三院滿學士各一員。九年八月。復改內三院爲內閣。置翰林院。十月。改三院大學士學士銜。加殿閣大學士兼尚書學士。掌

院學士。並兼禮部侍郎。十二月。設翰林院侍讀侍講學士。及侍讀侍講等官。員品如順治十五年定制。

世宗雍正三年十二月。晉翰林院侍讀侍講學士秩從四品。侍讀侍講從五品。如順治元年定制。

掌院學士

學士掌院事。卽承旨職也。

國初設有專員。

聖祖康熙二十八年五月。

諭大學士。翰林掌院一官。職任緊要。必文學淹通。衆所推服者。始克勝任。凡翰林撰擬之文。亦須掌院詳加刪潤。然後成章。聞明代大學士有兼管掌院之例。大學士徐元文著兼管翰林院掌

院學士事。

謹按掌院以重臣兼領。實起於此。

講官

世祖順治十二年三月。

諭內院。朕惟自古帝王勤學圖治。必舉經筵日講。以資啟沃。今經筵已定於文華殿告成之日舉行。日講深有裨益。不宜刻緩。爾等卽選滿漢詞

臣學問淹博者八員。以原銜充講官。侍朕左右。以備諮詢。

是年十一月。

諭吏部。日講官侍從禁庭。朝夕進講。國子監衙門較遠。職任難兼。如遇祭酒司業員缺。不必以日講官推補。

十四年九月。設經筵講官滿漢各八員。

是年十二月。增設日講官十員。

聖祖康熙九年。置起居注館於

太和門西廊。設滿記注官四員。漢記注官八員。俱以日講官兼攝。並設滿文主事一員。漢文主事二員。漢軍主事一員。滿文筆帖式。滿漢文筆帖式。漢軍筆帖式各四員。十二年。增設滿記注官一員。漢記注官二員。

十六年。增設滿記注官一員。二十年。增設漢記注官八員。三十八年七月。裁起居注滿漢主事各一員。五十七年三月。停起居注。

世宗雍正元年四月。復起居注官。

詔曰。自古帝王臨朝施政。左史記言。右史記動。蓋欲使一舉動。一出言之微。無不可著爲法則。垂

範百世也。

皇考聖祖仁皇帝。英年踐阼。卽設日講起居注官。
於詞臣中擇其才品優長者。以原官充補。鉅典
茂昭。度越前代。誠爲聖帝哲王之盛事。

御極六十一年。紹精一執中之統。厲敬

天勤民之心。文謨武烈。經緯萬幾。盛德日新。大業
鴻顯。天下臣民。仰瞻至治。不啻日月麗天。江河

行地。莫不敬信悅服。記注之臣。美不勝書。

皇考聖祖仁皇帝謙德彌光。聖不自聖。惟恐史官
或多溢美之辭。故康熙五十六年以後。裁省記
注。祇令翰林五員。於理事時輪侍班行。凡有重
務要旨。仍命內閣諸臣記而存之。意至周密也。
茲朕纘承大統。夙夜兢業。日昃不遑。思所以上
繼

皇考功德之隆。下致四海晏安之治。顧惟涼德。甚懼負荷之難。今御門聽政之初。益當寅畏小心。綜理庶事。咸期舉措允宜。簪筆侍臣。何可闕歟。當酌復舊章。於朕視朝臨御。

郊祀

壇

廟之時。令滿漢講官各二人侍班。不獨記載諭旨。

政務。或朕有一言之過。一事之失。皆必據實書諸簡策。朕用以自警。冀寡悔尤。庶幾凜淵冰之懷。以致久安。慎樞機之動。而圖長治。其仍復日講起居注官。如康熙五十六年以前故事。

是年十一月定制。日講官奉差。以翰詹官列名請署。停其開缺。差滿代還。

十二年七月。增設起居注漢主事一員。

皇上乾隆元年十二月。增設滿日講官二員。

謹按經筵滿講官。以內閣學士。掌院學士。讀講學士。詹事。少詹事。及尚書。侍郎。左都御史。副都御史。通政使。大理寺卿之曾任內閣學士。掌院學士。讀講學士者列名。漢講官。以內閣學士。掌院。讀講學士。詹事。少詹事。祭酒。及尚書。侍郎。左都御史等官之

由翰林陞任者列名。以原銜補充。康熙十六年。令滿洲小九卿之由翰林陞轉者。亦得列名。其日講官。則自掌院學士詹事以下。坊局編檢以上。皆得充補。

又按日講官侍直。康熙九年初設。記注定制。滿漢各一員。雍正元年復設。則令滿漢各二員侍直。

翰林官內擢

世祖順治十一年三月。令翰林官陞轉俱歸吏部。
十六年二月。吏部題補吏部右侍郎缺。得
旨。內閣既不設學士。翰林官無缺可陞。嗣後吏部
侍郎缺出。着照禮部侍郎之例。亦用翰林
官補授。

謹按吏部侍郎一兼學士銜。一不兼學士

銜。故事不兼學士銜者。翰林官不得推補。
至是並予列名。

聖祖康熙三十八年九月。

命京堂員缺。翰林官一體陞轉。五十七年八月。以
左都御史蔡升元請復。

命六部侍郎缺。翰林官與京堂應陞者均列名請
補。

世宗雍正元年正月定制。滿洲侍讀。侍講。諭德。洗馬。司業等缺。用各部應陞一人。翰林編修檢討一人。分班遞補。

謹按各部應陞。亦以科目出身者推用。

十年十月。令翰林官陞轉派差。將曾經記名褒獎議敘。及申飭訓誨處分之處。繕單隨本以聞。

翰林官外調

世祖順治十二年九月。吏部議定。正詹。以布政使
用。支正二品俸。少詹。以布政使用。侍讀學
士。以按察使用。侍讀。中允。以參政用。編修。
檢討。以副使用。

十六年九月。令翰林官侍讀以下。照科道
例。每年外轉。春季秋季各一員。侍讀。侍講。

以參政用。修撰以副使用。編修檢討以參議用。十八年九月奉

命停罷。

聖祖康熙三十七年十二月。副都御史吳涵以編修檢討人員。陞遷壅滯。疏請酌復變通。編檢照李濤。汪楫之例。外補一二人。講讀學士等。照王士正。徐潮。顧藻。主九齡之例。以

京堂各衙門調補一二人得。

旨。所奏極是。朕已知之。不必令部議也。

謹按先是李濤汪楫丁廷樾並外用知府。至是以吳涵請復改劉涵爲揚州府知府。其調補京堂並奉

明旨。已見內擢中。

三十九年四月。令編修檢討等揀選科道。

奉

旨改授者。馮雲驩。湯右曾。劉灝。宋朝南。彭始搏。張
瑗六人。

謹按編檢授科道始此。

世宗雍正元年十月。

命大學士會同掌院教習。秉公別擇。學問優長。字
畫端楷。或精於繙譯者。留衙門辦事。及各

館纂修。或才具練達。可當科道吏部之選。或長於吏治。編檢可爲道府。庶吉士可爲州縣者。分別具奏。老病衰廢。願自解退者。以原官休致。行止不端。事蹟確實者。奏聞革退。

庶吉士散館

世祖順治初。除授三院編檢外。改授科道數人。至

十六年散館。則有仍留教習者十餘人。外用者一人。黜革者一人。十八年散館。則有部用者十餘人。嗣是歷科參用其制。或中行評博。或知縣卽用。或歸進士原班。或用教職。法爲加備焉。

謹按庶吉士改授科道。歷科散館皆有之。至康熙三十六年丁丑。惟吳甫生。江珰二

人。自丁丑而下。遂停其改授。

庶吉士館選

國初本無定員。

世祖順治九年七月。

允科臣高幸允奏。按直省大小。取漢進士四十人。

直隸。江南。浙江。各五人。江西。福建。湖廣。山東。河南。各四人。山西。陝西。各二人。廣東。一

人以二十人習

國書二十人習漢書。其滿洲進士取四人。蒙古進士二人。漢軍進士四人。一體讀書。厥後選取各員。因地因才。遞有增減。歷科沿之。

世宗雍正三年四月。

諭大學士九卿等曰。前日李鍾珪奏稱翰林爲諸

材重地。自康熙四十五年至六十年七科。每省俱有庶吉士。雍正元年癸卯科。漢軍及河南四川進士無館選者。雍正二年甲辰科。蒙古及山西河南陝西四川廣東湖南廣西雲南貴州進士俱無館選者。請廣儲才之路等語。朕卽位之後。以培養人材。最重翰林。故加意詳慎。隆科多曾奏稱。

聖祖時館選。每省俱有庶吉士。所以朕於雍正元年癸卯科館選時。試其文義。觀其人品。於僻遠省分之人。亦酌量選取。又每諭教習之臣。盡心訓迪。迨後歷經揀擇。及考試文章。其中惟江浙人文義實較各省爲優。因將各省人員。分用於內外各衙門。而江浙人留館獨多。雍正二年甲辰科館選。亦詳加考試。朕因以文義優者。選爲

庶吉士。於是山西。河南等省進士。遂多不得與選。蓋翰林職司文章。若以文義不及者處之。則用違其才。而其人或有他長。反無以自見矣。朕凡於用人行政。無不審慎籌畫。務求當理。而選擇翰林。更爲留意。實欲使人人勿枉其才。各効所長。庶國家得收器使之效。豈計及於各省翰林之多寡有無也。今覽李鍾我奏。是必外人

有此議論。故以入告。朕甚嘉之。嗣後館選庶吉士。或應考試文義選取。或應每省額選幾人。或應分爲南北兩院。向來教習。止派滿漢各一員。今若按省分各選庶吉士。或亦按省分各設教習可乎。至各省未得館選之進士中。或有文義可充翰林之選者。爾等確有所知。卽行舉出。毋使人有逸才之論。尋議。歷科館選之法。盡善盡

美。更無遺逸之才。李鍾義條奏無庸議。從之。

五年五月。令進士殿試後。復試論詔奏議詩各一篇。先是。進士殿試畢。卽待選庶吉士。自順治丙戌迄康熙辛丑皆然。雍正元年癸卯。進士對策後。復引試於

保和殿。並令九卿各舉所知。至是。遂爲定制。時稱朝考焉。

謹按雍正元年十二月復令本科進士十七人在各館効力及在內官學教習至三年四月授夏之芳姜穎新二人爲編修黃岳牧陸宗楷二人爲檢討雖未爲著令亦掌故之足徵者。

皇上乾隆十年乙丑選宗室達麟圖一人爲庶吉士。

謹按定制。宗室不應科目之選。自雍正初。建立宗學。宗人子弟。以時讀書其中。自後五年一試。取其文合格者。

賜進士一體引對。至是館選達麟圖與焉。宗室入翰林始此。

改調館職

國朝崇尚文治。館制修明。自進士選除外。復

徵試詞科。並膺館秩事載。

恩遇卷中。其由他官改授者。如郎中張允欽。王士正。中書勵杜訥。高士奇。俱爲翰林講讀。給事中王原祁。爲中允。中書杜鎮。魏學誠。主事陳聶恒。知縣趙申季。教授王懋竑。俱爲編修。御史陳學海。爲檢討。左通政錢以塏。按察使趙殿最。則授少詹事。給事中康

五瑞則授侍讀學士。而進士方苞之授中允。主事廖必琦之改庶吉士。並稱曠典云。

兼銜

聖祖康熙十年正月。令提督四譯館太常寺少卿關防內。增鑄翰林院銜。

世宗雍正四年十二月。改直省學道爲學院。凡部曹奉差督學。加翰林院銜。二甲進士編修。

三甲進士檢討。受代後仍還本任。

皇朝會典

翰林院正官

滿漢掌院學士各一員

俱兼

禮部侍郎銜

滿漢侍讀學士各三員

滿漢侍

講學士各三員

滿漢侍讀各三員

滿

漢侍講各三員

史官

修撰

編修

檢討

無定員

庶吉士

無定員

首領官

滿漢典簿各一員

滿漢孔目

各一員

屬官

滿漢待詔各二員

滿筆帖式四

十二員

漢軍筆帖式四員

五經博士十八員

謹按我

朝五經博士。孔顏曾孟四姓外。其仲氏言氏。

卜氏。端木氏。東野氏。與宋張氏。邵氏。皆有之。崇儒重道之典。視前代爲加渥矣。

起居注館

日講起居注官

不專設以翰詹坊局官兼充雍正元年復設滿記注

官六員漢記注官十二員乾隆元年增設滿記注官二員

滿漢主事

二員

滿筆帖式十四員

漢軍筆帖式

二員

詹事府

漢

漢太子詹事有丞。漢書

按漢詹事。位在大長秋上。韓安國傳。壺遂
官至詹事。史記稱上大夫壺遂。則詹事在
漢爲上大夫。而百官表不著其秩。故宋劉
敞作漢官班序圖。遂以詹事爲無秩。臣瓚

注詹事。引茂陵書以爲真二千石。荀悅漢紀則云比二千石。通典又以爲真二千石。未知孰是。

漢太子中允四百石。漢儀注

按中允始此。漢百官表有中盾。無中允。中允特見於漢官儀。蓋卽中盾也。

後漢

後漢太子中庶子六百石。太子庶子四百石。

太子洗馬比六百石。

後漢書

按後漢承西京其宮官不得獨無詹事而百官志無之。或史氏之缺。庶子名見燕禮及燕義中。洗馬名最古。本吳越春秋。勾踐身爲夫差先馬。漢取此名官。而中庶子本秦官。漢仍用之。劉敞班序圖。庶子洗馬秩

最卑。位列縣丞尉羽林郎上。

晉

晉置詹事丞一人。中庶子四人。庶子四人。洗

馬八人。晉書

宋

宋置太子詹事一人。丞一人。中庶子四人。庶

子四人。洗馬八人。宋書

齊

齊置太子詹事府丞一人。太子中庶子。太子

洗馬各一人。南齊書

梁

梁爲太子置詹事。古今圖書集成

按隋書百官志。梁太子詹事。視中護軍。中

庶子四人。庶子四人。典經局洗馬八人。

陳

陳承梁。置太子詹事。文獻通考

按隋書百官志。陳承梁宮制。太子詹事中
二千石。太子中庶子二千石。庶子洗馬六
百石。詹事品第三。中庶子品第四。庶子品
第五。洗馬品第六。梁陳二史皆無志。故魏
徵作隋史。採二代之制而兼補之。

北魏

北魏太平真君五年。選諸良吏。給事東宮。北

魏書

北齊

北齊爲太子置詹事。左右衛率。典書坊。各率

其屬。古今圖書集成

按隋書百官志。後齊官制。多循後魏。有詹

事丞功曹主簿錄事員。左右衛二坊。各置司馬。

北周

北周置太子宮正宮尹。通典

隋

隋置詹事門下坊。置左右庶子二人。典書坊

右庶子二人。文獻通考

按凡詹事府坊局之稱。皆自南北朝始。至唐乃改典經局曰司經。而左右春坊相沿不改。

唐

唐置詹事府。太子詹事一人。少詹事一人。主簿一人。錄事二人。左春坊左庶子二人。中允二人。左諭德一人。左贊善大夫五人。司

經局洗馬五人。右春坊右庶子下。皆如左。

春坊。唐書

按唐左右春坊。蓋承魏齊二坊之設而爲之名。然考梁徐摛爲太子宮官。文體旣別。春坊皆效之。則春坊固不始於唐矣。又北周王褒皇太子箴。春宮養德。秋坊通夢。似古東宮官屬。春坊外又有秋坊者。或門下。

二坊初設。以春秋分名之歟。

宋

宋置太子詹事。太子左庶子。右庶子。左諭德。

右諭德。宋史

按宋史百官志云。舊制不常設。儲闈之建。隨宜制官。以備寮案。多以他官兼領。

金

金制。東宮設詹事。諭德以下。皆爲僚屬。古今

圖書集成

元

元立詹事院。置左右詹事各一員。副詹事詹

事丞。院判各二員。左右諭德。左右贊善。各

一員。庶子。中允各一員。元史

明

明洪武初。建大本堂。延名儒教太子親王。後設東宮官屬。有同知詹事院事。副詹事等官。以勲舊大臣兼之。二十四年七月。改院爲府。其堂上官。與本院官互兼職事。翰林記

明詹事府官

正官 詹事一員 少詹事二員 府丞

二員 首領官 主簿一員 錄事二員

屬官 通事舍人二員

坊官

左右春坊大學士各一員 庶子各一員

諭德各一員 中允各二員 贊善各

二員 司直郎各二員 清紀郎各一員

司諫各一員

局官

司經局洗馬二員 校書二員 正字二

員

按古東宮官屬。詹事外有太子太傅少傅。太子率更令等。二傅職輔導。率更職防衛。而詹事主統治內外。各率其屬以供事焉。太傅少傅。惟兩漢爲專官。卽諸侯王傳亦然。魏晉以下。則皆他官兼之。至明設太子

三師三少。特爲大臣加寵秩而已。且自唐以後。率更亦廢。惟詹事獨存。考之漢百官表。詹事掌皇后太子家。則又不獨爲宮官。若與大長秋相表裏。大長秋皇后屬卿也。明代尤重詹事。號爲宮相。實非三師三少之比。蓋春坊諭德贊善等。則古二傅之屬。洗馬。則古率更令之屬。

又按明洪武十五年。置左右春坊大學生。
至景泰三年。商輅。彭時。劉儼等。皆嘗爲之。
後復停罷。

又按明會典。南京詹事府。不設堂上官。止
設主簿一員。

皇朝

世祖順治元年。置詹事府。以少詹事一人掌府事。

其年十一月。

詔裁府署。職掌統於內三院。九年四月。復置詹事府。設詹事一員。少詹事二員。主簿一員。錄事二員。通事舍人二員。置左右春坊。設庶子各一員。諭德各一員。中允各二員。贊善各二員。司經局。設洗馬一員。正字二員。俱令內三院官兼之。時以府署止設漢員。因

專設滿詹事一員。掌管府事。而司其印信。其兼銜與漢官同。十五年五月。裁詹事府。

聖祖康熙十四年十一月。奉

詔復置。定滿漢詹事各一員。少詹事各二員。主簿各一員。錄事正字各二員。左右春坊庶子各二員。諭德各二員。左右中允各四員。贊善各四員。司經局洗馬各一員。三十七年

十二月。裁滿少詹事一員。諭德中允贊善
各一員。正字錄事各二員。三十八年七月。
裁漢中允贊善各一員。正字錄事各一員。
五十二年閏五月。裁漢諭德一員。漢中允
贊善各一員。錄事一員。

皇朝會典

詹事府正官

滿漢詹事各一員

漢詹事
兼翰林

院侍讀
學士銜

滿少詹事一員

漢少詹事二

員

兼翰林院侍
講學士銜

首領官

滿漢主簿各一員

左春坊

滿漢左庶子各一員

漢左庶子
兼翰林院

侍讀

滿漢左諭德各一員

漢諭德兼翰
林院修撰銜

銜

滿漢左中允各一員

漢中允兼翰
林院編修銜

滿

漢左贊善各一員

漢贊善兼翰
林院檢討銜

右春坊

滿漢右庶子各一員

漢右庶子兼翰林院

侍講

銜

滿漢右中允各一員

滿漢右贊

善各一員

兼銜同左

司經局

滿漢洗馬各一員

漢洗馬兼翰林院修撰銜

屬官

漢正字一員

府坊局筆帖式六

員